

En Xixón a 20 de febreru de 2019

PROPUESTA DE DECLARACIÓN INSTITUCIONAL EN DEFENSA DE LA OFICINA DE NORMALIZACIÓN LINGÜÍSTICA DE XIXÓN

Iniciativa pol Asturianu propón a los grupos municipales del Conceyu de Xixón una declaración institucional en defensa de la Oficina de Normalización Llingüística dempués de recibir esti muérganu y l'idioma ataques enllenos de radicalidá y falta d'empatía de dalgún partíu políticu que nun faen más que llevar a los que los faen a la marxinalidá, pues tán fuera de la realidá y lloñe del apreciu y el cariñu que los y les xixoneses tienen pa col asturianu.

La llingua asturiana nun pue ser elementu de confrontación, tien de ser un elementu d'alcuentru ente los y les demócrates, un elementu qu'amuese quien cree na llibertá. Amás, l'asturianu ye una parte más del nuesu patrimoniu cultural. El nuesu idioma tien de seguir ganando presencia na sociedá xixonesa y esi ye un llabor nel que la Oficina de Normalización Llingüística tien un papel importante como demostró nestos años. Dende Iniciativa pol Asturianu valoramos -y queremos que tamién lo faiga el Plenu del Conceyu- el constante llabor de la Oficina que dempués de tantos años cuenta con un espaciu digne. Actividaes como 'Saca la llingua', pallabreru, talleres y la rellación colos comerciantes y hosteleros pa fomentar l'usu del idioma faen qu'esti ente seya esencial pa que l'asturianu siga teniendo una presencia cada día mayor en Xixón.

En marzu de 2016, PSOE, Foro, Xixón Sí Puede, Izquierda Xunida y Ciudadanos daben el sí al Plan de Normalización del asturianu vixente y va unes selmanes la Oficina de Normalización Llingüística de Xixón cumplía 15 años de llabor dando-y presencia al idioma nel conceyu de Xixón. Dende la nuesa ONG proponemos al so grupu y a los demás, llevar una declaración institucional al próximu plenu municipal en defensa de la Oficina de Normalización Llingüística, de los sos trabayadores y de tol llabor na normalización del asturianu nel conceyu.

Por too ello, al traviés de la presente declaración institucional queremos manifestar:

- 1) El sofitu del plenu de Xixón a la Oficina de Normalización Llingüística de Xixón y a los/les sos trabayadores.
- 2) La defensa de la so llabor nestos 15 años dándo-y presencia al idioma nel conceyu.
- 3) La defensa del Plan de Normalización aprobáu por PSOE, Foro, Xixón Sí Puede, Izquierda Xunida y Ciudadanos.
- 4) El respetu a la llingua asturiana, los entes y organizaciones que trabayen na so defensa y normalización.
- 5) Continuar sofitando les diferentes campañes que s'entamen dende la Oficina de Normalización.
- 6) Xenerar un clima de consensu y respetu al rodiu del idioma.

Inaciu Galán y González
Presidente d'Iniciativa pol Asturianu